

RIOM



Glindesdi è rut ora in incendi en ina stalla a Riom. FOTO FOLKHA CHANTUNALA GRISCHUNA

Grond donn material en cas d'incendi – appel a perditgas

Glindesdi è rut ora in incendi a Riom en ina stalla. Pauc pli tard ha tenor la comunicaziun da medias da la polizia da mardi cumenzà ad arder er la chasa d'abitat daspera. Enturn las 23.30 è arrivà tar la Polizia chantunala dal Grischun l'annunzia ch'ina stalla ardia. Al lieu han ins stui constatar ch'era la chasa d'abitat era pertutgada. Ils pumpiers da Surses, Alvra ed ils pumpiers da las ovras da la Ems-Chemie èn arrivads cun var 60 persunas ed han surprindì las lavurs da stizzar. En stalla sa chattavan in pèr vehichels, però nagin muvel. Las persunas han pudì sortir sezzas or da la chasa. La Polizia chantunala dal Grischun tschertga persunas che san dar indicaziuns per sclerir quest incendi. Annunzias per plaschair a la basa da polizia a Lai-Alvra, sin il numer da telefon 081 257 78 10. (cdm/fmr)

SURSES




I dovra buns eglis ubain ina buna drona per chattar ils ansiels en il pastg aut. FOTO MAD

Crowdfunding lantschà

Dapi 2021 s'engaschan chatschadras e chatschaders da la Val Surses per il salvament d'ansiels. Sco ch'ins po leger sin la pagina d'internet dad Anavant Surses, han dapi lura già 40 animals giuvens pudì vegnir salvads sin prads. En vista da la primavaira 2025 ha la sezziun da chatscha da Surses e Curver dentant basegn d'ina nova drona cun ina camera termica per il salvament d'ansiels. Per finanziar quella èn las chatschadras ed ils chatschaders dependents d'agid finanziar, sco ch'ins po leger tar Anavant Surses. Perquai han els lantschà in acziun da crowdfunding via RaiseNow. Tut en tut dovra la sezziun da chatscha 8 000 francs per pudair far la cumpra. L'acziun da crowdfunding va anc fin la fin d'avrigl. (cdm/fmr)

insarant



Il Center da Sanadad Savognin cumbatta dapi onns cun problems finanzials, po dentant quintar cun il sustegn dal Cumeegn Surses e da la populaziun. FOTO DAVID TRUTTMANN

Nagin ruaus a Savognin

Il Center da Sanadad Savognin procura puspè per lingias grassas. Quella giada dentant betg pervia da la situaziun finanziala, mabain pervia da la demission da la directura actuala Claudia Husmann.

TONI VINZENS/FMR

Mardi avantmezdi ha Daniel Wasescha, il president communal da Surses e commember dal cussegl d'administraziun dal Center da Sanadad Savognin (CeSa), confermà envers RTR la midada: Claudia Husmann ha demissionà sco directura dal CeSa. Ella è stada en uffizi dapi il 1. da fanadur 2023.

Sin la pagina d'internet èsi entant già inditgà che Sandra Luzio saja directura ad interim. Ella è stada enfin uss vicedirectura dal CeSa. Co ch'i va vinavant, quai n'è anc betg cler, sco che Daniel Wasescha ha explitgà a la FMR.

Ina situaziun intscherta

«Igl è ina schliaziun ad interim», ha Daniel Wasescha accentuà areguard la midada en la direziun. Dapli che confermar quella na po il president communal entant betg: «La midada è capitada sin l'entschatta da mars. Igl è stà ina decisiun communabla da la direziun sco gremi ed il cussegl d'administraziun.» Claudia Husmann lavuria dentant vinavant al CeSa, quai anc enfin l'avust che vegn. Ella sco era autras persunas da la direziun n'èn dentant betg stadas a disposiziun per las dumondas da la FMR.

Actualmain na san ins perquai betg dapli. Il cussegl d'administraziun e la direziun dal CeSa n'han anc betg decidì davart la successiun ed ils proxims pass. En vista a la situaziun finanziala precara dal CeSa n'è quai dentant betg la suletta decisiun da prender. Il cussegl d'administraziun e la direziun ston numnadain era preschentar plans per smuinir il deficit.

E già ils 6 d'avrigl 2025 decida la radunanza communal da la vischnanca da Surses davart ils 2 milliuns francs ch'ella aveva approvà en connex cun ses preventiv per l'onn 2025 (guarda box).



Sandra Luzio (a sanestra) ha surpiglià ad interim la direziun dal Center da Sanadad Savognin, suenter che Claudia Husmann ha demissionà l'entschatta da mars 2025. FOTO GION NUTENEN STIGER

Situaziun precara a Savognin

Il Center da Sanadad Savognin (CeSa) è responsabel per il provediment da basa staziunar ed ambulat en la region Surses. El cumpiglia in spital acut, il servetsch d'urgenza da 24 uras, il servetsch da salvament, ina pratica da medi, fisioterapia, in center da fitness ed ina chasa da tgira cun abitaziuns per attempads.

Cunquai ch'il dumber da pazientas e pazients è sa reduci ed ils custs da persunal èn s'augmentads ils ultims onns, ha il Center da Sanadad dentant problems finanzials. Cuntzunt il spital procura per cifras cotschnas.

Sustegn dal Cumeegn Surses

Il december dal 2024 ha la radunanza communal dal Cumeegn Surses perquai approvà en connex cun il preventiv per l'onn 2025 in sustegn da 2 milliuns francs per il CeSa. Quai per covrir il deficit dad 1,68 milliuns francs che quel aveva scrit l'onn 2023, sco ch'ins po leger en il rapport annual.

La vischnanca ha dentant già sustegnì l'onn passà il CeSa cun pajaments anticipads, uschia il president communal Daniel Wasescha: «Per ch'il CeSa restia liquid, ha la vischnanca anticipà a quel ils imports dal 2024 e per part dal 2025.» Che la vischnanca, vul dir la suprastanza communal, sa senta in summa responsabla per il CeSa, ha da far cun il fatg ch'ella posseda 97% da las accizas. La CeSa sco societad d'accizas è perquai quasi en maun da la vischnanca.

Senza il sustegn finanziar dal Cumeegn Surses avess il CeSa damai già stui serrar las portas. Ils 2 milliuns francs approvads en connex cun il preventiv duain damai garantir vinavant la liquiditad. Els èn dentant per il mument anc bloccads, sco ch'ins po leger en il protocol davart la radunanza communal dal december 2024. Sche quella summa vegn concedida, stoppia vegnir decidì ad ina proxima radunanza communal la primavaira 2025.

Sustegn da la populaziun

Che la radunanza communal na conceda betg la summa approvada, quai n'è entant strusch probabel. Las davosas sairas d'infirmaziun areguard la situaziun dal CeSa (ils 18 da settember ed ils 3 da december 2024) han numnadain mussà ch'il sustegn da la populaziun è grond. Tant envers la FMR sco envers RTR è la tenuta generala stada a favur dal CeSa e da ses spital.

Il CeSa saja simplamain memia impurtant per la region per al laschar crudar. Sco ch'ins po numnadain leger en il rapport annual 2023, na porscha il CeSa betg be il provediment da basa, mabain era lavur a radund 120 persunas e plazzas d'emprendissadi.

Perquai è dal reminent er il plan da reducir la purschida dal spital sin l'enviern fruntà sin resistenza ed ha fatg naufragi l'onn passà. La populaziun vul mantegnair il spital durant tut l'onn sco part dal CeSa. Actualmain è la balla perquai puspè tar il cussegl administrativ e la direziun dal CeSa che sto proponer autras schliaziuns per la situaziun finanziala precara.

Ch'i gjaja en l'avegnir senza il sustegn da la vischnanca, quai n'è entant strusch imaginabel. (fmr/vit)